


Mas di 700 Lider di Barrio a acudi na Congreso di MEP

4 Resolucion a keda aproba



Mas di 700 lidernan di barrio di MEP a acudi na e congreso di e partido ayera mainta. Ta un congreso anual di e partido. Directiva a duna cuenta di henter nan maneho di e partido, esta tanto financiero y di e trabao den oposicion. E ser trata no menos 4 resolucion.

ORANJESTAD(AAN)—

Ayera den Cas di Cultura partido MEP a tene un congreso di partido.

Diferente miembro di partido a hiba palabra y locual nan a trece padilanti ta lo siguiente.

Considerando
-cu MEP tin entre otro como meta: "Haci tur locual ta posible pa alcanza un reparticion husto di entradanan y prosperidad, pa asina yega na un mayor grado di igualdad economico den e comunidad Arubano";

-cu gobierno di Aruba a demostra claramente durante dos aña di gobernacion cu den su maneho social-economico e no ta tene cuenta suficiente mente cu esnan di menos recurso den nos comunidad;
-cu envez di kita medidanan manera priminti durante campaña electoral, gobierno a introduci medidanan extra, generando mas di 150 Mijon Florin, un impuesto di solidaridad nobo di 4.1 por ciento, aumento di prijs di gasolin, prijs di importacion, etc., etc., cu ta ranca hopi placa for di nos pueblo;

-cu gobierno no ta controla mas prijs di articulonan di primera necesidad;

-cu gobierno ta permiti y tolera abuso di nos forza laboral door di acepta cu cierto dunadornan di trabao ta duna trahadornan solamente contrato di tres luna cu ta keda ser prolonga pa periodonan di tres luna, manteniendo e trahador den inseguridad pa locual ta toca cu pan di cada dia;
-cu gobierno no ta duna representantenan di su empleadonan den sector publico

oportunidad adecuado pa defende interes social-economico di nan miembronan;

-cu venta di warda di polis, Aruba Palm Beach Hotel y Hotel Americana a proba cu gobierno no ta defende patrimonio di nos pueblo y cu e ventananan aki no ta sirbi interes general;

-cu gobierno a cera un acuerdo cu Exxon cu ta na desventaha di nos pueblo y cu futuro lo demostra cu nos pueblo a sali perhudica;

-cu gobierno a nenga Parlamento mediante ley e derecho di participacion den tumamento di decisionan relaciona cu otorgamento di permiso pa explora y explota petroleo;
-cu asuntonan di caracter nacional manera venta di hotelnan, acuerdo cu Exxon, otorgamento di permiso pa bora petroleo ta ser trata sin participacion di Parlamento, dificultando asina e tarea di nos representantenan pa percura pa reparticion husto di entradanan y prosperidad den comunidad Aruba;

Ta dicidi

1. Pa invita gobierno di Aruba pa mas pronto cu ta posible institui control ariba articulonan di primera necesidad.

2. Pa urgi gobierno busca un solucion definitivo pa e problema di contratonan di tres luna pa trece tranquilidad den hogar di hopi trahadornan Arubiano.

3. Pa expresa cu MEP ta honra acuerdo di Noord y ta di opinion cu Gobierno di Aruba mester honra acuerdo di Noord.

4. Pa exigi cu gobierno di Aruba mester duna Parlamento

debido participacion den tur asunto di ehecuion di ley di petroleo pues otorgamento

MESTER LAGA TUR PARTIDO ORGANISA UN MANIFESTACION PA RECLAMA ELECCION NOBO

Considerando

-cu gobierno ta goza di sosten di un mayoria minimo di unicamente 11 miembro den Parlamento di Aruba;

-cu e mayoria marginal cu ta sostiene gobierno ta representa solamente 28 por ciento di e electorado cu a participa na eleccion di dia 22 di November 1985;

-cu e mayoria minimo di 11 miembro di Parlamento ta consisti di 7 miembro di Staten di partido AVP y no menos cu 4 miembro di Staten independiente;

-cu e 4 parlamentarianan independiente no ta representa partidonan cu a participa democraticamente na eleccion di dia 22 di November 1985;

-cu dos partido, PPA y PDA, cu legalmente y democraticamente a participa na eleccion dia 22 di November 1985 no ta representa mas den Parlamento;

-cu gobierno pues no tin sosten di un mayoria cu ta basa ariba resultado di eleccion y consecuentemente no tin un base democratico;

-cu sosten di mayoria a base di eleccion ta democratico mientras cu sosten di mayoria ficticio a base di manipulacion ta moralmente condenable y anti-democratico;

-cu e situacion politico-gubernamental anti-democratico aki ta conduciendo nos pais

pa un dictadura di minoria;

-cu den un estado di derecho esaki ta empugna di un di nos derechonan pa desaroyo di nos democracia;

Ta dicidi

1. Pa urgi gabinete Eman pa pone un fin inmediatamente na e situacion politico anti-democratico na Aruba mediante eleccion nobo pa pueblo, por expresa su mes y haya un representacion a base di su escohenca.

2. Pa duna directiva di partido e mandato pa organisa, hunto cu otro entidadnan politico y gremial, un manifestacion pa reclama eleccion nobo pa termina e dictadura di minoria.

GOBIERNO MESTER INSTITUI "RAADSCOMMISSIE ONAFHANKELIJKHEID ARUBA"

Considerando

-cu un di e metanan di partido ta: lucha contra cualquier forma di coloniasion, realizando e independencia di Aruba;

-cu conferencia di mesa rondo teni di 7 te cu 12 di Maart 1983 na Den Haag entre Hulanda, Antiyas Hulandes y Aruba a acepta cu Aruba lo haci uso di su derecho di autodeterminacion realizando su independencia na 1996;

-cu entrante promer di Januari 1986, pa un fase transitorio di diez aña, Aruba a haya "Status Aparte" gobierno di Aruba a asumi un posicion di no haci ningun di e preparacionnan necesario ariba tereno

estatal;

-cu durante e segudo congreso extra-ordinario di MEP dia 25 di Mei 1986 teni na Aruba Concorde Hotel, partido a dicidi pa recomenda gobierno di Aruba pa institui un comision a base amplio pa reparacion di independencia den un mancomunidad cu Hulanda, consistiendo di entre otro representantenan di partido politico, gremio sindical, gremio comercial y clero;

-cu ehecutando e decision di congreso MEP den Staten di Aruba na diferente ocasion a presenta mocionnan pa urgi gobierno pa percura pa Aruba ta bon prepara y semper un paso dilanti den asuntonan cu ta toca nos futuro structura estatal;

-cu sin embargo gobierno di Aruba ta mantene su actitud pasivo y hasta ta nenga di contesta preguntanan di gobierno Hulandes encuanto un posibel mancomunidad cu Hulanda despues di independencia;

Ta dicidi

1. Pa condena severamente e actitud pasivo di gobierno ariba tereno estatal cu tin como consecuencia cu Aruba ta acercando independencia sin ningun clase di preparacion.

2. Pa sigui recomenda gobierno di Aruba pa institui un comision a la "Raadscommissie Onafhankelijkheid Aruba" pa asina ariba un base amplio preparacion serio por tuma lugar concerniente nos futuro estatal.

3. Pa reconfirma cu punto di bista di MEP ta: cu Aruba mester realiza su independencia den un mancomunidad cu Hulanda.

GOBIERNO MESTER HACI COMBATIMIENTO EFECTIVO DI DROGA PRIORDAD NUMBER UNO

Considerando

-cu segun declaracion di Procurador-General interino di Aruba trafico ilegal di droga via Aruba, especialmente cocaína, ultimo temponan a aumente den forman alarmanante;

-cu haf di Aruba ta un centro importante den transportacion di acetona y ether;
-cu ultimamente containernan yena cu barilnan di acetona a ser movi, kibra, habri y barilnan di acetona a disparce for di haf na Aruba;

-cu investigacion a tuma lugar sin duna ningun resultado concreto;

-cu Interpol y DEA tin atencion fiho riba Aruba pa motibo di hayasgo di acetona y saco cu miles di Dollar riba tereno di haf di Aruba;

-cu constantemente na Hulanda, Aruba ta ser denomina como trampolin den trafico di



Sigui lesa pag. 14